



**Pembinaan** bandar berdaya saing dan maju bukan sekadar dinilai pada bangunan atau infrastruktur semata-mata. Elemen organik pada penduduk seperti susur budaya dan warisan turut menjadi teras hala tuju agenda bandar masa depan.

Justeru, Perbincangan Meja Bulat dalam Malaysia Urban Forum 2019 yang berlangsung di Pusat Kovensyen Kuala Lumpur (KLCC), baru-baru ini memperkatakan berkenaan agenda Bandar Budaya

#### Warisan.

Isu menyeluruh berkait rapat dalam pembangunan bandar kreatif dikupas pakar yang mewakili komuniti kreatif, ahli akademik dan pihak kementerian termasuk Timbalan Menteri Perumahan dan Kerajaan Tempatan, Datuk Raja Kamarul Bahrin Shah Raja Ahmad yang tampil dalam perbincangan selama dua jam itu.

Ia mendapat perhatian hampir 200 peserta yang mewakili pelbagai pihak seperti agensi kerajaan

swasta sehingga peringkat universiti.

Dalam sesi sama, isu diketengahkan panel dari Fakulti Kejuruteraan, Teknologi dan Pembinaan Alam Sekitar UCSI University, Prof Dr Mohd Tajuddin Mohd Rasdi turut menekankan isu bangunan rumah ibadat juga perlu diberi perhatian.

"Pembinaan atau struktur dalam bandar sejahtera, elemen perlu diambil perhatian bukan saja oleh pengamal arsitek pembandaran membabitkan isu

bangunan rumah ibadat, sebaliknya umum juga seharusnya tahu.

"Berdasarkan perkembangan semasa, isu ini kritikal apabila mempengaruhi keharmonian sosial selepas 60 tahun kita merdeka.

"Fabrik urban dimiliki bandar di Malaysia cukup berwarna-warni dan seharusnya pihak berkuasa serta umum mempunyai kesedaran berkenaan aspek pengurusan dalam satu pembinaan rumah ibadat.

"Beberapa aspek perlu dipersetujui termasuk impak bangunan terbabit yang dibina dalam pembangunan masa depan terhadap komuniti baik dari aspek trafik, gangguan dan sebagainya," katanya.

Turut menarik perhatian, isu perbandaran diketengahkan dalam perbincangan terbabit meliputi landskap bandar yang kurang bercirikan budaya dan terlalu 'keras' berbanding lokasi bandar lain.

Maklum balas diberikan rata-rata panel mengakui karakter atau fabrik urban dipengaruhi fungsi lokasi itu selain penduduknya.



Berdasarkan perkembangan semasa, isu ini kritikal apabila mempengaruhi keharmonian sosial selepas 60 tahun kita merdeka

**PROF DR MOHD TAJUDDIN**

